

**Und dann hält' i'...**

Text & Musik: Andre Blau

Månchmoi is' Kirtåg in mei'm Schädel, mit 1.000 Ringelspiel' aus Blei,  
 die fähr'n auffi bis zum Himmi und duat schmilzt's da Våta ein ...  
 Er gjaßt an Bleisårg für die Tot'n und a Spieldos'n für mi',  
 mit ana Tänzerin und Spiag'l, und die ziag i' auf und dänn draht sa si'.  
 Dänn drah i' mi ...

**Ref.:** Und dänn hält i', dänn hält i',  
 he, dänn hält i' di'  
 und dänn is' ållas, ållas wieder guat ...

Und jeder, der si' net drah'n wü, draht si' um zur Geisterbåhn  
 und schaut si' duat die oid'n und die neich'n Geister ån.  
 Duat gibt's an scheenen tot'n Kaiser und an Påpst, der Netzstrümpf trägt,  
 der Tango tänzt und jodelt, wånn ma nur zwamoi „Amen – Amen“ sågt.  
 Dänn bin i' gånz stü ...

**Ref.:**

Jeden Freitag hängt da Schammes dänn an echt'n Führer auf,  
 der vafåult dänn bis zum Sunntåg und dänn ersteht er wieder auf.  
 Die Musikanten spiel'n an Wålzer und der Pfårra hupft åm Tisch  
 und er måcht aus Wåsser Slibovitz und aus an Sauschåd'l an Fisch ...  
 Dänn måch' i' die Aug'n zua ...

**Ref.:**

Dänn geht irgendwånn die Sunn auf und ihr Låch'n is' aus Bluat,  
 und neben ihr da Knochenmånñ håt aus Sternschnuppen an Huat.  
 Und sie nehman mi' åm Schoß, so für a hålbe Ewigkeit,  
 und wånn i' dänn' nix mehr tuan kånn, dänn wird es für mi' Zeit,  
 dass i' aufsteh und geh'...

**Ref.:** Åber vuaher hält i', då hält i',  
 he, då hält i' di'  
 und dänn wird irgendwie ållas wieder guat ...